

Tut onn blera vita en l'edifizi dal cussegl grond

DA FLURIN ANDRY / ANR

■ **Dapi passa quatter ons fa Hubertus Pazeller da pedel dal bajetg cun la sala dal cussegl grond e sias stanzas da seduta. L'edifizi vegn duvrà quasi minga di dad organisaziuns e societads.**

«Propi quiet nun èsi mai en chasa», di *Hubertus Pazeller*, il pedel da l'edifizi dal cussegl grond a Cuir, «er tranter las sis sessiuns dal parlament gischun.» Durant l'auter temp salvan qua sco ch'el cuntinuescha organisaziuns chantunals e privatas sco bancas, assicuranzas ed autras lur radunanzas. Schizunt la fin d'emna vegnan duvrads locals da la chasa per sedutas, curs e lavuratori: «L'università da Cambridge per exempel ha purschè tar nus gia plirs curs.» Per el sco pedel il temp il pli intensiv è dentant las sessiuns dal cussegl grond.

«Il temp passa spert»

La damaun in quart avant las set avra Hubertus Pazeller las portas da l'edifizi. «Sco emprim fetsch jau ina controlla da surengiu, guard che tut saja en urden.» Sin il segund plaun da la chasa sa chattan trais stanzas da sedutas, sin l'emprim è la tribuna dals aspectatur ed ils locals per la pressa. Sin il plaunterren è il foyer cun la receziun ed il local principal, la sala gronda. Suten sa chattan la gardaroba ed ils locals sanitaris. «Durant las sessiuns pend jau or er las bandieras, la grischuna e la svizra, la glicud che passa sa alur ch'il parlament è sa radunà en chasa», di il pedel. Vers las set e mesa arriva alur il postin cun las gassetas, las qualas Hubertus Pazeller metta pront sper l'entrada sin il pult da la receziun. Sco proxim arrivon ils polizists che pisseran durant la sessiun per la segirtad en chasa. Entant ha controllà il pedel er la temperatura en sala e guardà ch'els 128 microfons funcziunan tuts. Uss arrivon l'in suenter l'auter u er en gruppas ils deputads al cussegl grond. Durant il di va Hu-



bertus Pazeller a controllar er auters edificis chantunals, sco p. ex. quel da l'uffizi da construcziun auta. El è dentant adina cuntanschibel per telefon e spert enavos, sche *Julius Maissen*, il salter chantunale, al duvrass causa problems cun la tecnica.

La saira, a las sis, las sis e mesa, cur ch'il parlament ha finì da tractar, gida il pedel la nettegiunza a preparar il bajetg per il proxim di. Er sch'el arriva a chasa pir a las otg, las nov la saira na cumplan-scha el betg dals dis lungs: «Cunquai ch'i capita adina puspè insatge passa il temp spert.»

In bun maun per la tecnica

Il pedel da l'edifizi dal cussegl grond do-

vra bler inschign tecnic: «Quai m'hai jau accurschè pir cur che jau hai entschet la lavur avant quatter onns e mez», ri Pazeller, «ma ins empra spert.» Da professiun è el fravi. Suenter l'emprendissadi a Tusaun aveva'l lavurà durant dus decennis en il Sennhof a Cuir sco schef d'ufficina. «Mia lavur actuala am plascha bain», di el, ch'i saja agreabel a lavurar cun ils politichers ed er cun ils schurnalists. «Ma mintgant am manca la lavur da fravi bain in zic», tradescha Hubertus Pazeller, «perquai fatsch jau quai en mes temp liber.» Sco ch'el declera fa'l surtut lavurs artisticas en metal sco cliniez, sculpturas, chandaliers ed auter pli. Ha'l la finamira da viver in bel di mo pli da quella lavur? «Jau hai bain studegià er gia

quai, ma perentant na vuless jau betg anc far quel pass – ma forse pli tard, tgi sa?»

Curt e bun

Num: Hubertus Pazeller

Data da naschientscha:

1. avust 1960

Domicil: Cuir

Vischnanca patria: Tarasp

Hobis: Teater, far la lutga e tschaiser

(far salamuiras, commember da la Pizokel-Kligga)

Bavronda prediletta:

Aua minerala